


Serlimar y Ecogas a yega na acuerdo den procesamiento di sushi

ORANJESTAD (AAN):

Entrante 1 di Juli venidero, Dump Parkietenbos lo bay ta practicamente ceras!

Gobierno tin su pensamiento den e cambio y kico ta bay haci cu procesamiento di sushi y funcionamiento di dump na Parkietenbos. Shete luna pasa tempo di eleccion, tur partido politico sin excepcion a bisa cu mester atende cu e problema di dump. Durante un debate cu mi mes a atende, e partidonan a bisa cu den 100 dia cu nan ta den gobierno lo cera dump na Parkietenbos.



E gobierno aki a para tambe pa esey pero lamentablemente e proceso tabata uno mas largo cu a spera. No solamente ta cera Parkietenbos pero mehora e situacion y mira con ta bay haci cu e sushi cu tin ey riba. Pa haci e trabao a lanta un comision, un Taskforce Waste Management cu a envolvi tur hefe di departamento di gobierno cu tin di haber cu esaki. Tambe a envolvi sindicatonan, ATIA, esunnan cu ta biba rond di Parkietenbos, WEB como un posibel partner pa cualkier proceso cu por tin den futuro y experionan di TNO riba e tereno aki. Un comision bastante balansa y amplio cu a traha un rapport cu a ser entrega. Gobierno tabata habri riba dje y dos luna pasa a bisa si, cu mester cana

E acuerdo ta encera cu ta hiba e sushi di cas y comercial cu no ta gofivul na Ecogas. Gobierno ta paga Ecogas pa paketa e sushi y Ecogas ta paga Gobierno/Serlimar pa dera e sushi na Sero Tjishi. Un tereno cu legalmente gobiemo a apunta.


Segun Minister Oubber e diferencia cu Parkietenbos cu tin un sero haltu unda ta tira sushi tur caminda, e proceso na Sero Tjishi ta hopi mas organiza pa por dera den subsuelo. Apesar cu ta haci test na laboratorio di e sushi prome cu e worde dera lo pone safety valve pa gas. E meta ta, pa para 90% di e actividadnan na Parkietenbos. E contract cera entre Serlimar y Ecogas ta uno di seis luna. E trayecto pa yega na un procesamiento nobo ta dura 1 aña y mei cu e oportunidad pa extende e contracto aki. E trabao a cuminsa dialuna cu a pasa, unda trucknan di Serlimar a cuminsa hiba e sushinan pa e planta di Ecogas y pa prome di juli manera e contract ta bisa, tur truck di sushi di Serlimar lo hiba e sushinan pa worde paketa pa despues dera nan na Sero Tjishi sin cu esaki ta causa daño na medio ambiente. Den futuro por destina e area aki den un Solar Park unbes cu e buiraconan keda tapa conforme standardnan internacional.

PAHO a yega di bisa hopi cla cu no por sigui tira sushi na Parkietenbos pesey huntu cu Minister Dangui Oduber di Salubridad a percursu pa PAHO bin Aruba. Nan a bisa cu Aruba ta way den overtime y loke tin na Parkietenbos ta un time bom. Un time bom no solamente peligroso pero uno di salud pa esunan cu ta traha ey riba y pa esunnan cu ta bay tira sushi cu por tin consecuencia serio pa nan salud.

Como mandatario encarga, mi ta enfatisa, cu no tin way back pa continua cu dump di Parkietenbos y a tumu e decision basa riba estudio y rapportnan cu a traha. Pa loke ta e gastonan envolvi, gobierno di Aruba a absorba esaki pasobra e ta hinca den e presupuesto. Gobierno a yega na un punto responsabel cu Parkietenbos y pa prome di juli practicamente e ta cera. E actividadnan cu lo keda ey riba ta solamente 10 pa 15% pa grofviul of material peligroso cu no por hiba otro caminda. E desperdicionan aki lo keda mancha na un manera responsabel. Nos ta spera cu pa mita di aña 2020 lo por inverti den un planta nobo cu lo bay atende cu e sushi.

#special Recordando Jossy riba su fecha natal

Skirbi pa: Gerardo Sanson
pa Aruba y mi kerido DIARIO



Recordando Jossy M. Mansur awe riba su fecha di nacemento.

TABATA riba dia 7 di Juni 1934 cu el a nace na Aruba, nos maestro recorda JOSSY MANSUR. Ya di mucha el a demostra su vocacion literario, mirando su interes pa lesa hepi buki disponibel y scuchando e noticianan di radioemisoranan di e tempo ey.

El a cuminsa su educacion preparatorio na Aruba y su mayornan a empulhe pa e alumno hoben aki por a bay Merca y na 1951 el a gradua na high school na St. Louis Mississippi y cuater aña mas laat el a haya su graduacion di periodista cu e maximo honor (Summa Cum Laude).

Jossy su amor pa su dushi tera a impulse pa regresa Aruba, y di e forma ey el a yuda suministra su conocimiento di cultura general na disposicion di hopi amigo y alegadonan.

Pa algun tempo despues cuminsa cu e idea di bin cu un corant cu por refleta e desaroyo di Aruba. Mientras cu tempo a pasa, Jossy a cuminsa cu su propio literatura y facilidad pa skirbi cu sapiencia y calidad literario na cuater idioma y el a bin cu algun ensayonan. (Den literatura nos ta referi na "ensayo" na un estilo di texto den prosa cu ta trata un tema determina).

Asina ta cu e cadena di ensayonan a demostra Jossy su exito literario, y e desfile di bukinan skirbi a cuminsa.

Diccionarionan di cuater idioma... su Historia di Aruba (cu mester ta un cathedra na scolnan)... E indiano nan Caiquetio... Y e cantidad di novelanan interesante na spaño cu a wordo hopi gusta na Venezuela y Colombia, ademas di Aruba naturalmente.

Su coleccion di tres tomo di "Un poco di tur cos" ta un legado intelectual invaluable cu nos por lesa tur dia den DIARIO. Jossy su principal legado ta su amor pa periodismo y su capacidad y claridad haltu pa haci su inolvidable Editorial y Analisis Politico yen di claridad y mustRANDO e caminda corecto pa nos isla.

Ta di spera cu e generacion di hobennan actual por siña hopi di e ilustre yiu di Aruba, Sr JOSSY M. MANSUR....

Nos ta cordabo semper JOSSY, especialmente e dia di awe.



Peticion pa aprobacion di un plan di parcelacion na Tamarijn conforme art. 33 di e Ordenanza di desaroyo territorial (LRO). E concepto di e plan di parcelacion ta poni pa inspeccion publico na **DIP, Sabana Blanco 68**, durante un luna desde dia **11 juni 2018** durante oranan di trabao. Tambe e plan por wordo mira riba www.dip.aw. Interesadonan por entrega te cu un luna despues di e termino aki nan punto di bista por escrito tocante e concepto di e plan di parcelacion cerca Ministro di Desaroyo Teritorial, Infraestructura y Medio Ambiente pa medio di Management Team DIP.



Ministro di Husticia ta anuncia cu entrante **8 juni 2018** segun Ley di Molestia, durante 30 dia lo tin oportunidad pa un y tur tumu conocimiento na Departamento di Legislacion y Asunto Huridico, **Schotlandstraat 53** di un peticion y amexo cu a ser haci pa instalacion di **gas di 2x100 Lbs na Rembrandstraat 25**. Durante dicho periodo aki tur hende por expresa por escrito nan obheccion contra dunamento di e permiso menciona, dirigi na e Ministro di Husticia, via director di Departamento di Legislacion y Asunto Huridico, **Schotlandstraat 53**.